

زده بو شرف عالمها ایله مشرف، مردرلو زنجیر ظلم و استبدادی قیره رق مبدل اولدق . بناء علیه بو شاهراه مسعدتی تعقیب ایدم . تعقیب ایدم که بر آن اول مسعود اولم .

سماد مختار

معاهداتمز [۱]

قایتولاسیونلرک تاریخی

ممالك عثمانیه اجنبیلرک حال و موقعی سار مملکتلرده ساکن اولان اجنبیلرک حال و موقعلرندن تقریق ایدن و « قایتولاسیون » نامیه یاد اولنان اصول قونسلوسلرک حق قضالری اولق و بالخاصه تبعه لرینه متعلق معاملات عدلیه ده تفتیش و نظارت و حایه صلاحیتی حاز بولنق مثللو اساس عهدیه بی شاملدر .

بواسول اوروپا حقوق عمومیه سنده موجود و حقوق مذکوریه مستند دکلدر . ممالك شرقیه اسکیدن قلمه در . چین ، آننام و سار بعض آسیا مملکتلرنده مرعیدر . ژاپونیا ده دخی واردی ، یقین زمانلرده قالدیرلدی .

قایتولاسیونلر حقوق خصوصیه دوله مستقل بر بحث طویل تشکیل ایدر بو بحثه کیرمه دن اول قایتولاسیونلرک منشأندن ، تاریخندن بحث ایلمک لازمدر .

ازمنه قدیمده ممالك شرقیه ایله بلاد غربیه آرمسند چوق مناسبات یوغیدی . تاریخ قدیم عالم مدینتی یالکیز بحر سفید سواحلندن عبارت اولق اوزره کورمشدر . اووقتلر روما اداره جمهوریه سی حکم فرما ایدی . اما اصل وقایع

[۱] بو سرلوحه آلتندکی مقالات اشو موضوع مهم حقنده کی تبعات نتیجه سنی داخله ناظری و معارف ناظر وکیل حق بک افندی حضرتلرینک مکتب حقوقده کی تقریرلری ایله مزج ایدرک قلمه آلتنددر . ابن الضیا

سیاسیه رومانك انقراضندن سوكره باشلامشدر . چونكه رومانك انقراضيله مدنيت و فكر تجدد محو اولمامش ، تجزی و انبساط ايتمشدر و شوندن بوكونكي اوروپا حصوله گمشدر .

دها سوكره عالم سياسيات يكدیكیرینه تماماً ضد اولمق اوزره ایکی یه آیرلمشدر . بوتفرقه نك یكانه سبی دین و ملت اختلافی در .

اشبو ایکی عالمدن بری روما انقاضی اوزرنده تأسیس حكومات ایدن جرمان و فرائق اقوامندن و دیگرى اسلامك ظهوری اوزرنیه تأسس ایدن حكومت اسلامیه دن متشكلدر . ایکی فرقه برقاچ دفعه مصادمه ایلدیلر . خاصمه تعیین و تحدید حدود مقصدندن انبساط ایلدی . بو محاربه لك باشلیجه لری اسپانیایی عربلردن استرداد ایچون اسپانیوللرله عربلر آره سنده و شرقده دخی عربلر و سلجوقیلر ایله شرقی روما یعنی بیزانس ایمپراطورلنی یئننده وقوعه کلان محارباتدر .

غربده کی محاربه اندلسك عربلردن نزعی ، شرقده کی محاربه ده اناطولینك تقسیمى ایله نتیجه لندی .

شومحارباتدن سوكره شرق ایله غرب آره سنده مناسبات همان هیچ قالمدی . یالکز حاكمدارلر یكدیكیرینه آره صره هدیه لر کونده بر لردی ، ایکی طرف خلقی ایسه بیلشمز ، طایشمازدی . سنه ده بر ویا ایکی دفعه بر شرق کیسی غربیه کیدر ، غربدن بر کمی شرقه کلیردی .

شرق ایله غربك مناسبت و اختلاطی تاریخك اهل صلیب محارباتی نامیله آیردینی دور مخصوصده اهمیتله باشلایه رق اندن سوكره تكثر ایلدی . ایکی طرفی صلح و آسودکی ایچنده یاشارلرکن بر برینه قاتوب آسیای صغرای و اراض فلسطینی قان دریاری حالته صوقان اوروپالیلر و اوروپا تعصبی اولمشدر . اوروپا ملل عیسویه سی قدسی اسلام الندن المق ایچون آقین آقین انظار شرقیه ده دوکولدیلر ؛ غربك برکوشه سی دخی هرج و مرج اولدی . اهل صلیب محارباتی ایکی قسمه آریلیر : بری شرقده دیکری غربده اولاندردر . اولکنده مطمح

نظر، دیدیکم ز کجی، قدسک ضبط و تسخیری ایدی؛ ایکنجیده مقصد اندلسک
عربلردن اخذ و استردانی ایدی. شرقده کی اهل صلیب عماربانه سبب حسیات
دینه و غلیان تعصبر، غربده کی اهل صلیب محاربه لری فتح و استیلا فکرن
لشات ایشدر. محاربات صلیبی شرقیه اوروپاچه پک زیاده ترقی بی انتاج ایش
و سکز سفرده واقع و تمام اولشدر. غربده کی اهل صلیب مصادمانی دخی
یوزلرله سنه دوام ایلمشدر اگرچه اوروپالیر شو حربلردن ماده و اول امرده
متضرر اولدیلر، لکن شرقک مدینتی کوره رک متنبه و اومدینیدن حصه دار
فیض اولدیلر. بوحربلر سایه سنده درکه اوروپاده تجارت بریه و بحریه ایلرولدی.
جنوه، وندیک، بارسلون، مارسلیا و سائرلر بیوک بیوک تجارت دوغالرینه
ملک اولدیلر.

برنجی [عجری ۴۹۰-۴۹۳]، ایکنجی [۵۴۲-۵۴۴] و اوچنجی [۵۸۵-۵۸۸]

[۵۸۸] سفرلرده اوروپادن میلیونلرله خلق مملک شرقیه یورودیلر، ارض
فلسطینه ایندیلر. بر دفعه قدسک استیلاسی اوزرینه غربیلردن برجوخی
شرقه اختیار اقامت ایلدیلر. فرنک محله لری تشکل ایلدی.

دردنجی سفر [۵۹۷-۶۰۱] ده شرق ائمراطورلری لاتینلرک الله کجی.
استانبولده بولان قیصر سلاله سی افرادی ازنیق و طربزون طرفلرینه تبعید ایلدی.
استانبول جوارنده اوروپا پرسلرینک زیر اداره سنده اوله رق حکومتلر تشکیل
اولندی. حتی مناستر و سلانیک حوالی ده غرب بکلرینک تحت تصرفنه کجی
غلطه بی و کرید آطه سیله سار جزایر بحر سفیدک برطاقنی وندیکلیر الدیلر.

ایشته شرق ایله غرب اده سنده مناسبات بو وجه ایله باشلادی. اوروپا
محصولاتی مملک شرقیه و شرق محصولاتی ده دیار غربیه سهولته کیدر کلیر
اولدی. صلاح الدین ایوبی یه قارشو اولان اوچنجی سفرده فرهدریق باربروسک
اردوسی قسطنطنیه طریقه قره دن، فرانسه حکمداری فلیپ اوکوستک اردوسیله
انکلتزه قرالی «ریچارد» ک اردوسی دکزدن کلدی. دردنجی اهل صلیبده
مهاجمات ینه بحر اولدی.

یشی سفر [۶۱۴-۶۱۸] ده دخی آلمان اردولری دکز یولیه کلدیلر .
 آتشی [۶۲۶-۶۲۷] سفر پایا طقوزنجی غره غوارک حمایه سی آتنده
 وقوع بولهرق آلمانیایمپراطوری ایکنجی فره دریق ریاستنده اجرا اولمش
 وقدسک بلا محاربه فتحیله نتیجه لیش اولوب یدنجی [۶۴۶-۶۵۲] وسکزنجی
 [۶۶۹] سفرلر فرانسه قرالی سن لوی طرفدن مصر وتونس اوزرینه ایقاع
 ایدلمش و بولندهده عساکر بالطبع دکزدن سوق اولمشدر . عسکر نقلی
 احتیاجندن طولانی درکه آق دکزده اوزون سفرلری اجرایه صالح برچوق کی
 پیدا اولمشدر . مناسبات تجاریه انقطاع محاربات ایله منقطع اولیوب بالعکس تکثر
 ایلدیکندن تجارت بحریه نک ترقیسی تأمین ایتک ایچون لیمانلر یابلمشدر . مارسیلیا
 وجنوه لیمانلری اک بیوک تجارتگاه اولدی . اسپانیاده بارسلون لیمانی ده احراز
 اهمیت ایلدی . حاصلی اوروپالیردن تجارت بحریه ایله کینه جک بر سوری
 خلق پیدا اولدی . تجارت بحریه ایچون قانونلر یابیلدی .

اهل صلیب محارباننده ممالک شرقیه کلوبده عودت ایتیمه رک اورالرده
 اختیار اقامت ایدنلر صفت اجنبیه لرینی محافظه ایتک وکندی قانونلری احکامنه
 مهما ممکن یاقلاشیر بر اصول اداره استثنائی آتنده یاشامق ایستیدیلر . بویانجیلرله
 حکومت محلیه نک مناسباتی تعیین ایتک لازم کلدی . شوراسی لازم الاخطاردرکه
 بحثنده بولندیغمز وقلرده اوروپاده شخصیت قوانین اصولی تأسس ایتمش و بو
 اوروپالیرر بواصوله آلیشمش اولدقلرندن محلی نظاماتیه اداره اولنق کندیلرینه
 آغیر کلیوردی [۱] مثلا رومالیرر قانونی رومالیرر حصر ایدرک اجانبه تطبیق

[۱] «شخصیت قوانین» دژ مقصد «استاتو پرسونل» در . اختلاف قوانین بحثنده
 «استاتو» کلامی «Loi قانون» مرادنی اولهرق مستعملدر . حقوق خصوصیه دول
 قواعدنجه استاتو پرسونل (قوانین شخصیه) حکمی شخصک ماهیت قانونیه سنه و «استاتو»
 تورده نل (قوانین حقیقیه ویا ملکیه) ایسه حکمی غیر منقولانک تعریفاته متعلق
 اولان قانونلره اطلاق ایدیلیر . مثلا زوجیت ، ابوت ، بنوت ، خلاصه ، بالجله درجات
 قرابت قوانین شخصیه ایله تعیین ایدر . املاکک صورت تعریف و فراغ و انتقالی ایسه
 قوانین ملکیه و حقیقیه دندر . مثلا بزده برقادینک وفات ایتمش بر آدمک زوجیه سی

ایتمز لردی . حتی خارجی تبعه لرینه یعنی رومالی اولیانلره کندی قانونلرینک احکامنی تشمیل ایتمز لردی . کذلک فرانکلر و جرمانلر حکومت تشکیل ایلدکلی وقت کندیلرینی تابعیتلرینه کیرن خلقدن قانونجه فرقلی طوتدیلر .

زمانک استعدادیه خلقدن کندی قانونلرینه تابع اولمق میلی واردی . فرضا مارسلیا تجاری جنویه کیتدکلی وقت مارسلیا قانونلرینه تابع اولور لردی . قایتولاسیون اصولی اولاشرق ایمراطورلغنه تطبیق اولندی . بیزانسیلیر ایله اوروپالیلر دیناً متحد فقط عادت و لسانجه مختلف اولدقلرندن اوروپالیلری قوانین محلیه اتباع مشکلدی . اهالیدن بر طاقی رومیله بر طاقی روما و پرووانس دیلیریه تکلم ایلدی ؛ شرق عارف و مألوف اولمدینی جریان عاداتی بو دیارده کورولوردی . بوندن بشقه اجنیلر مملکتده یلیسلره قاریشیق اوطورمازلردی . یلیلر اجنبی محله لرینه کیتمز لردی ، حتی ، اجنبی محلاتنک اطراف دیوار ایله محاط بولنوردی .

شو اختلاف السنه و عادات یوزندن شرق ایمراطورلنی داخلنده اقامت ایدن اجانب ایله حکومت محلیه آره سنده بر طاقم اختلافات اداره وعدلیه ظهور ایلدی . حل اختلافی اتمک اوزره و ندیکلیلر لسانمزده بالیوز تعیر اولنان قونسولسر تعین ایتدیلر و حکومت محلیه طانتسیدر دیلر . اگر بر یلی ایله بر و ندیکلی آره سنده دعوی اولورسه بوکا باقان محکمه محلیه ده قونسولس بولنوردی . بالیوز لسان محلیه واقف اولیان اجنبیه رجمانلق ایدردی .

میلادک ۱۱۵۵ سنه سندن اول استانبول ایله ملحقانته کلان ایتالیالیلرک واسع امتیازلری اولمدینی کبی جنوه لیلرک صورت دائمده اقامتلیر ایچون محال

اوله رق املاکه تصرف ایتمی اولاش او آدمک زوجه سی اولدیغنک تعین ایتسنه وابسته دره بو تعین دخی تبعه مسلمده ثبوت شرعی ایله ، تبعه غیر مسلمده نکاحک وجودی رؤسای روحانیه طرفلرندن تصدیق ایدلکله و تبعه اجنبیه ده قونسولخانه نک تصدیقیله اولور . بو زوجیت مسائلی « استاتوپرسونل » در . زوجیت تعین ایتدکن صوکره شو صفتک املاکه حق ارث و یروب و یرمدیکنی و وریورسه حصه ارنیه نک مقداریتی « استاتوره نل » تعین ایدرکه قانون عثمانیدر .
- ابن الضیا -

مخصوصه یوغیکن او تاریخده حکمدار بولان «امانوئل قومنوس» لایتلرک تلطفی مقاصد حکومتله منافع ملکیمه موافق ظن ایدرک قدیمدن برو استانبولده یرلشمش فرنکلرک امتیازاتی تزید و بولرک اقامتیرینه یرلر تخصیص ایددی . او سردهه جنوز رؤسای قومنوسه بر سفیر کوندهروب اگر کندیلرله عقد معاهده ایدرسه ممالکنک محافظه سینه معاونت ایده جکلرینی افاده وشومعاونته مقابل امتیازات طلب ایتلری واشبو طلبی بر وضع تهدید ایله اجرا ایلملری اوزرینه بیزانس حکومتی ایله جنوه آره سنده بر معاهده عقد اولنه رق جنوه لیلره خیلی امتیازات ویرلدی . جنوزلر استانبول ایچنده بر بازار علی بر اسکله و برده کلیسا ایدیندیلر . بو عهد ایجابجه استانبولده یوزده ددرت و ملحقانده سارلایتلرک ویردکلری رسمی ویره جکلر ؛ بیزانس حکومتک بالجه ممالکنده جنوزلرک اموالی تعرضدن مصون اوله جق ؛ جنوه سفینه لری کال سربستی ایله اجرای اسفار ایده جک ؛ جنوه لیلردن بری بر جرم ایقاع ایده جک اولورسه آنجق مرکز حکومتده حکمدارک متعلقینی حضورنده محاکمه اولنه بیلوب کفیل ویردیکی تقدیرده قبل الحکم موقوف قلمسی جائز اولمیه جق ایددی . تعداد اولنان امتیازاته مقابل جنوه سفیری دخی ایپراطور قومنوسه بر عهدنامه اعطا ایلدی .

بو وجه اوزره لایتلر استانبولک بر کوشه سنی عادتا اشغال ایدرک دائره اقامتلی داخلنده حکمران اولدیلر . بر مدت قلیله ظرفنده نفوسلری آلتش بیکه واردی .

اشته اجانبک ممالک ساردهه کندی قانونلرله اداره اولنسی عادتق شرقرده قایتولاسیون اصولنک تأسسنه سبب اولدی .

ابن الضیا

— دوام اولنه جقدر —